



## Naqqiut

Siunnersuut 3. September 2024-meersoq taarserpaa

(Makku naqqiutigineqarput - siunnersuuteqartup aqqi naqqiutigineqarpoq – malitsigisaanillu siunnersuummilu oqaatsit naqqinneqarlutik)

Inatsisartut suleriaasianni § 36 malillugu, matumuuna oqallinnissamik siunnersuut aallaavigalugu apeqquteqarpunga.

### **Meeqqat atuarfiini atuartunut ilinniartitsisunullu atugarissaarneq pillugu apeqquteqaat aallaavigalugu oqallinnissamik siunnersuut.**

(Inatsisartunut gruppiat, Naleraq)

Meeqqat atuarfianni ilinniartitsisutut sulininni ilinniartitsisoqaterpassuakkalu akulikillingaluttuinnartumik nalaattarparput meeqqat pissusaat unaminarsiertortut, taamaalilluni atuartitsinerup pilersaarutaasumik ingerlanissaralua pinngitsoortarluni. Meeqqat pissusaat ilaatigut sakkortoorujussuusarput, akunnerminni qingasaarunnerit meerarpassuillu iluamik sinissimanatik atuariartortartut arlaqarlutik aamma nerisimanatik ilaatigullu atuagaasiveqaratik imaluunniit atuakkanik ilannakortunik nassataqartarlutik.

HBSC misissuinermi kingullermi (Meeqqat atuartut peqqissusaannik, atugarissaarnerannik misissuititsineq) Kalaallit Nunaanni ilaatigut takutinneqarpoq siulianit misissuisimanermit qingasaarisarneq qaffariarsimasoq kiisalu meeqqat kiserliortut kisitsisitigut qaffasissorujussuarmik inissisimasut, affaasa apersoneqartut piffissap ilaatigut piffissamiluunniit sivisunerpaami kiserliortuusut.<sup>1</sup>

Meeqqanut, inuusuttunut ilaqutariinnullu suliniutit pitsaasorpassuit ingerlanneqartarput pinaversaartitsinernut peqqinnerulernissamillu siursaataasunik ingerlanneqartartunik, pingaartumik sunngiffimmi kiisalu inoqutigiit akornanni ilaqutariinni sannginnerusuni suliniutit ilaallutik.

Meeqqalli atuarfianni pissutsit ulloq manna tikillugu isigissagaanni soorlu pineqartoq iluamik isumagineqanngitsoq.

Ilinniartitsisutut sianissutsikkut timikkullu artornartorujussuuvoq ullut tamarluinnaasa meeqqanit sakkortuumik pissusilersorfigineqarlunilu akerartugaasarneq. Suliffeqarfinni

---

<sup>1</sup> [https://www.sdu.dk/da/sif/rapporter/2024/skoleboernsundersoegelsen\\_i\\_groenland\\_2022](https://www.sdu.dk/da/sif/rapporter/2024/skoleboernsundersoegelsen_i_groenland_2022)



# Naleraq

timikkut tarnikkullu persuttaqaaneq akuerineqanngilaq ingerlaannartumillu tamanna aqqusaarneqarsimatillugu qanoq iliuuseqarfigineqartarluni. Meeqqat ajortuuniarlutik kissaatigineq ajorpaat qularnanngitsumilliuna ikioqqullutik nilliasartut. Atuarfimmi ilinniartitsisut, atuartitsinissamik pisussaaffiup saniatigut meeqqat pitsaasumik piginnaasaasa ineriartornissaat annertuumik kissaatigisarlugu atuartitsissutini assigiinngitsuni ingerlattarpaat, kisianni klassemi eqqissisimatitsiniarneq taama annertutigisunik unamminartoqartillugu arlalitsigut pakatsimalluni nikallungalunilu ingerlaffiusarpoq. Ajornerpaaffianilu uippakajaalernermik kinguneqartarluni aamma atuarfimmi ilinniartitsisup napparsimalerneranik kinguneqartarluni.

Naleqqamiit isumaqarpunga meeqqat atuarfimmilu ilinniartitsisut pissutsini taamaattuniitiinnarnissaat tulluanngitsoq, taamaattumillu atuartunut atuarfimmilu ilinniartitsunut pissutsit oqallisigissagivut kissaatigaara.

Atuartummi ilinniartitsisullu akornanni ingerlalluarneq atuartumut atuariartornissamut piumanerulersitsisartoq qularutiginngilara, taamalillunilu aamma atuarfimmi ilinniartitsisunik peqaannarnissamut oqinnerulersitsisararluni.

Tamanna qulequtaq aallaavigalugu oqallilluarnissamik kissaassivunga.